

Peluang silat dikenali merata dunia

12 NOV 1987

Oleh ISMAIL ALI

4

PERSEKUTUAN Silat Singapura (Persisi) sedang berusaha dengan bersungguh-sungguh untuk menjadikan seni silat sebagai satu seni pertahanan diri yang setanding dengan karate, taekwando dan judo.

Selaras dengan usaha ini, Persisi akan mengadakan satu pertunjukan Senaman Beramai Gerak Silat atau 'Permainan Massa' di Stadium Negara pada 29 November ini mulai 5.30 petang. *Panca Sakti*

Pertunjukan anjuran Majlis Kebangsaan Olimpik Singapura (SNOC) dengan kerjasama Majlis Sukan Singapura (SSC) ini akan dipersembahkan di hadapan Presiden Jawatankuasa Olimpik Antarabangsa (IOC), Antonio Juan Samaranch dan Presiden Majlis Olimpik Asia (OCA), Syekh Fahad Al-Ahmed Al-Sabah.

Turut hadir untuk menyaksikan pertunjukan itu ialah para wartawan luar negeri yang dijangka memperkenalkan sukan tradisional ini ke negara masing-masing.

"Kami berasa peluang memperlihatkan seni silat kepada dua tokoh penting ini merupakan satu cara yang baik untuk memperkenalkan seni ini kepada dunia," kata Setiausaha Agung Persisi, Encik Johari H.M. Uriff.

Dengan demikian, katanya lagi kita akan dapat menunjukkan bahawa seni silat juga adalah setara dengan seni pertahanan diri lain.

"Tambah pula, dengan adanya wartawan-wartawan asing, seni silat akan diberi pendedahan untuk diketahui ramai," jelas beliau.

Sejajar dengan usaha Persisi itu, Encik Johari telah menyeru para jurulatih silat setempat supaya mempergiat latihan mereka untuk memaju dan meningkatkan lagi mutu seni silat.

"Untuk mencapai peringkat ini, mereka haruslah membuat kajian yang lebih saintifik yang dapat menambahkan kesan kepada setiap pergerakan yang dilakukan," tambahnya lagi.

Beliau menegaskan, ini akan dapat dicapai hanya jika para jurulatih dan pesilat setempat lebih gigih dan menumpukan sepenuh perhatian pada latihan mereka.

Dalam pertunjukan itu, seramai 60 pesilat daripada lima perguruan di bawah naungan Persisi akan mengambil bahagian — Perguruan Persaudaraan Panca Sakti, Seni Silat Sendeng Belalang, Seni Silat Cekak, Seni Silat Setia Bakti dan Seni Silat Seligi Tunggal.

Turut dipersembahkan pada hari itu ialah permainan sepak-takraw oleh Persekutuan Sepaktakraw Singapura (Perses).